

SILVA BANOVIĆ

**Delegatkinja u Domu naroda
Parlamenta Federacije Bosne i Hercegovine**

Sarajevo, 19.02.2026. godine

**PARLAMENT FEDERACIJE
BOSNE I HERCEGOVINE
DOM NARODA**

n/r gđin Tomislav Martinović, predsjedavajući

Bosna i Hercegovina
Federacija Bosne i Hercegovine
PARLAMENT FEDERACIJE
SARAJEVO

Primljeno: 19-02-2026

Org. jed.	Broj	Priloga	Vrijednost
02	-02-	690	/26

**PREDMET: PRIJEDLOG ZAKONA O DOŽIVOTNOJ NAKNADI ZASLUŽNIM
SPORTISTIMA U FEDERACIJI BOSNE I HERCEGOVINE, dostavlja se**

Na osnovu člana 172. Poslovnika o radu Doma naroda Parlamenta Federacije Bosne i Hercegovine („Službene novine Federacije BiH“, br. 27/03, 21/09, 24/20 i 60/24), kao ovlaštena predlagačica, podnosim radi razmatranja i usvajanja, **PRIJEDLOG ZAKONA O DOŽIVOTNOJ NAKNADI ZASLUŽNIM SPORTISTIMA U FEDERACIJI BOSNE I HERCEGOVINE.**

Napominjem da je Predstavnički dom, na 28. redovnoj sjednici održanoj 19. i 20.01.2026. godine, usvojio Prijedlog zakona o doživotnoj naknadi zaslužnim sportistima u Federaciji BiH.

Delegatkinja

Silva Banović

Silva Banović

PRIJEDLOG

***ZAKON O DOŽIVOTNOJ NAKNADI ZASLUŽNIM SPORTISTIMA U
FEDERACIJI BOSNE I HERCEGOVINE***

Sarajevo, februar 2026. godine

ZAKON

O DOŽIVOTNOJ NAKNADI ZASLUŽNIM SPORTISTIMA U FEDERACIJI BOSNE I HERCEGOVINE

POGLAVLJE I – OSNOVNE ODREDBE

Član 1.

(Predmet zakona)

Zakon o doživotnoj naknadi zaslužnim sportistima u Federaciji Bosne i Hercegovine (u daljem tekstu: Zakon) uređuje uslove i način za ostvarivanje prava doživotne novčane mjesečne naknade zaslužnim sportistima u FBiH, obaveze zaslužnih sportista, evidenciju, nadzor i reviziju nad ostvarenim pravima.

Član 2.

(Značenje izraza koji se koriste u zakonu)

Izrazi koji se koriste u ovom zakonu imaju sljedeća značenja:

- a) Doživotna mjesečna naknada: doživotna mjesečna novčana naknada zaslužnim sportistima u FBiH, koji ispunjavaju uslove propisane ovim zakonom.
- b) Zaslužni sportista: sportista koji je prema članu 3. Pravilnika o kategorizaciji sportista u BiH („Službeni glasnik BiH“, broj: 52/16) pripada kategoriji Zaslužni sportista, a koji su ostvarili značajne sportske rezultate i osvojili:
 - I-III mjesto na Olimpijskim igrama;
 - I-III mjesto na Svjetskom prvenstvu;
 - I-III mjesto na Evropskom prvenstvu;
 - I-III mjesto na Paraolimpijskim igrama.
- c) Zaslužni sportista iz Socijalističke Federativne Republike Jugoslavije (u daljem tekstu: zaslužni sportista Jugoslavije) je sportista koji ostvaruje pravo doživotne mjesečne naknade na osnovu rezultata koje je ostvario kao reprezentativac bivše Jugoslavije i osvojio I – III mjesto na takmičenjima iz tačke b.) ovog člana.
- d) Komisija za dodjelu doživotne mjesečne naknade (u daljem tekstu Komisija): Stručna komisija koja se imenuje na mandat od 4 godine pri Federalnom ministarstvu kulture i sporta (u daljem tekstu: Ministarstvo), koja razmatra zahtjeve, evidentira, vrši nadzor, reviziju i izvještava o ostvarenim pravima po ovom zakonu.

Član 3.

(Svrha zakona)

Ovim zakonom se pruža mogućnost zaslužnim sportistima da ostvare pravo na doživotnu mjesečnu novčanu naknadu, kao nagrada za zalaganje i postignute rezultate, ali i stimulans mladim i perspektivnim sportistima u FBiH.

Član 4.

(Ravnopravnost spolova)

Riječi koje su radi preglednosti navedene u jednom rodu, bez diskriminacije se odnose i na muški i na ženski rod.

POGLAVLJE II – USLOVI I NAČIN OSTVARIVANJA PRAVA

Član 5.

(Financijska sredstva)

Ukupna financijska sredstva za provedbu ovog zakona su planirana u Budžetu Federacije Bosne i Hercegovine za svaku godinu, na razdjelu Federalnog ministarstva kulture i sporta, a u skladu sa članom 10. Zakona.

Član 6.

(Uslovi za ostvarivanje prava)

Zaslužni sportista u smislu ovog Zakona, radi ostvarivanja prava na doživotnu naknadu treba da ispunjava sljedeće uslove:

- a) da ima navršenih 40 godina starosti,
- b) da je osvojio medalju u olimpijskim i paraolimpijskim sportovima, pod zastavom BiH ili u reprezentaciji BiH ili Jugoslaviji prije rata, shodno članu 7. ovog zakona,
- c) da je kategorisan kao zaslužni sportista u BiH,
- d) da ima državljanstvo BiH i da živi na teritoriji FBiH,
- e) da u periodu od osvajanja medalje pa do stupanja zakona na snagu, nije mijenjao državljanstvo ili nastupao za reprezentaciju druge države ili nastupao u klubovima druge države.
- f) da posjeduje dokaz o ostvarenim sportskim rezultatima sa potvrdom nadležnog sportskog saveza,
- g) ne prima naknadu za ostvarene sportske rezultate u zemljama bivše Jugoslavije, odnosno ne prima naknadu od strane bilo kojeg nivoa administrativnog organizovanja u BiH,

- h) da nije pravosnažno osuđen za krivično djelo,
- i) da tokom takmičenja nije mu izrečena pravosnažna mjera zabrane takmičenja od strane evropske i svjetske sportske federacije ili pravosnažna kazna zbog kršenja antidoping pravila.

Član 7.

(Način za ostvarivanje prava)

(1) Postupak dodjele doživotne mjesečne naknade vrši se na osnovu javnog poziva koje Ministarstvo objavljuje za svaku godinu nakon usvajanja Budžeta, a najkasnije do 30. aprila.

(2) Zaslužni sportista će prilikom prijave na javni poziv biti dužan dostaviti slijedeću dokumentaciju:

- a) Izvod iz matične knjige rođenih,
- b) Uvjerenje o prebivalištu-CIPS,
- c) Dokaz o ostvarenim sportskim rezultatima u FBiH, sa potvrdom nadležnog sportskog saveza,
- d) Potvrda o kategorizaciji zaslužnog sportiste u BiH iz člana 2. tačka b) ovoga zakona,
- e) Uvjerenje o državljanstvu sa potvrdom da isto nije mijenjano u proteklom periodu,
- f) Ovjerena izjava da podnosilac zahtjeva ne prima naknadu za ostvarene sportske rezultate u zemljama bivše Jugoslavije, odnosno ne prima naknadu od strane bilo kojeg nivoa administrativnog organizovanja u BiH,
- g) Potvrda da se ne vodi krivični postupak,
- h) Ovjerena izjava da podnosiocu zahtjeva nije izrečena pravosnažna mjera zabrane takmičenja od strane evropske i svjetske sportske federacije ili pravosnažna kazna zbog kršenja antidoping pravila,
- i) Potvrda o transakcijskom računu podnosioca zahtjeva.

(3) Zaslužni sportista je, pored zahtjeva i tražene dokumentacije iz stava (2) ovog člana, dužan priložiti i druge podatke koje Ministarstvo propisuje posebnim podzakonskim propisom.

Član 8.

(Provođenje postupka za ostvarivanje prava po ovom zakonu)

(1) Po okončanju javnog poziva, Komisija iz člana 9. Zakona će donijeti Prijedlog Odluke o ostvarivanju prava na doživotnu naknadu i istu dostaviti federalnom ministru kulture i sporta (u daljem tekstu: Ministar).

(2) Ministarstvo će razmotriti Prijedlog Odluke Komisije i shodno istom donijeti Rješenje o ostvarivanju prava na doživotnu mjesečnu naknadu zaslužnim sportistima u FBiH.

(3) Protiv rješenja Ministarstva može se pokrenuti upravni spor pred nadležnim sudom.

(4) Pri rješavanju o pravima za ostvarivanje predmetne novčane naknade primjenjuju se odredbe Zakona o upravnom postupku, ukoliko ovim Zakonom nije drugačije određeno.

Član 9.

(Komisija za dodjelu doživotne naknade)

(1) Komisija broji 7 članova, koji su birani na mandat od četiri godine.

(2) Sastav Komisije čini: 1 predstavnik Ministarstva, 1 predstavnik Olimpijskog komiteta BIH, 1 predstavnik Paraolimpijskog komiteta BIH i 4 predstavnika iz četiri sportska grantska saveza.

(3) Komisija razmatra prijave sa priloženom dokumentacijom, vodi evidenciju o licima koja ostvaruju prava po odredbama ovog zakona, vrši nadzor nad primjenom ovoga zakona i izvještava o ostvarenim pravima.

Član 10.

(Koeficijenti za obračun doživotne naknade)

(1) Iznos doživotne mjesečne naknade izračunava se tako što utvrđeni koeficijent množimo sa prosječnom neto platom u FBiH, a usklađuje se početkom svake godine sa podacima Federalnog zavoda za statistiku.

(2) Koeficijenti se dodjeljuju zaslužnim sportistima shodno postignutim rezultatima i natjecanju na kojem je rezultat postignut kako slijedi:

a.) Olimpijske i Paraolimpijske igre :

1.) Pojedinačne discipline (zaslužni sportisti):

- Prvo mjesto – zlatna medalja: 1,80
- Drugo mjesto – srebrna medalja: 1,70
- Treće mjesto – bronzana medalja: 1,60 prosječne neto plate u FBiH u prethodnoj godini za mjesec u kojem se isplaćuje,

2.) Ekipne discipline (za članove ekipe):

- Prvo mjesto – zlatna medalja: 1,60
- Drugo mjesto – srebrna medalja: 1,50
- Treće mjesto – bronzana medalja: 1,30 prosječne neto plate u FBiH u prethodnoj godini za mjesec u kojem se isplaćuje,

b.) Svjetsko prvenstvo:

1.) Pojedinačne discipline (zaslužni sportisti):

- Prvo mjesto – zlatna medalja: 1,70
- Drugo mjesto- srebrna medalja: 1,50
- Treće mjesto: 1,40 prosječne neto plate u FBiH u prethodnoj godini za mjesec u kojem se isplaćuje,

2.) Ekipne discipline (za članove ekipe):

- Prvo mjesto – zlatna medalja: 1,50
- Drugo mjesto- srebrna medalja: 1,30
- Treće mjesto: 1,10 prosječne neto plate u FBiH u prethodnoj godini za mjesec u kojem se isplaćuje,

c.) *Evropsko prvenstvo:*

1.) Pojedinačne discipline (zaslužni sportisti):

- Prvo mjesto – zlatna medalja: 1,50
- Drugo mjesto- srebrna medalja: 1,40
- Treće mjesto: 1,20 prosječne neto plate u FBiH u prethodnoj godini za mjesec u kojem se isplaćuje,

2.) Ekipne discipline (za članove ekipe):

- Prvo mjesto – zlatna medalja: 1,40
- Drugo mjesto- srebrna medalja: 1,20
- Treće mjesto: 1,00 prosječne neto plate u FBiH u prethodnoj godini za mjesec u kojem se isplaćuje,

Sredstava za ostvareno pravo obračunavaju se prema zvaničnim podacima organa javne uprave nadležnog za poslove statistike i uplaćuje se na račun fizičkog lica.

Član 11.

(Obaveze zaslužnih sportista koji ostvaruju pravo po ovom zakonu)

Zaslužni sportista koji je ostvario pravo na doživotnu mjesečnu novčanu naknadu je, u skladu sa svojim mogućnostima i zdravstvenim stanjem, dužan:

- a) Odazivati se na pozive nadležnog sportskog saveza za pomoć i podršku perspektivnim mladim sportistima,
- b) Ostvarivati saradnju sa Olimpijskim komitetom i Federalnim ministarstvom kulture i sporta,
- c) Učestovati u manifestacijama koje promovišu sportske aktivnosti i razvoj sportske djelatnosti u FBiH,
- d) Prenositi svoje znanje u sportskim školama.

Član 12.

Naknada zaslužnih sportista se ne može nasljeđivati.

Naknada zaslužnih sportista se isplaćuje iz Budžeta Federacije BiH.

Naknada zaslužnih sportista se može primati samo po jednom osnovu za najbolji sportski rezultat u skladu sa odredbama člana 6. ovog Zakona.

Član 13.

(Prestanak prava)

(1) Zaslužni sportista gubi pravo na doživotnu mjesečnu novčanu naknadu u jednom od sljedećih slučajeva:

- a) Prestankom uslova za ostvarivanje naknade iz ovog Zakona (profesionalni rad sa bilo kojim sportskim savezom druge države, pravosnažna presuda za krivično djelo...),
- b) Davanjem lažnih podataka prilikom podnošenja Zahtjeva,
- c) Ukoliko Revizija pokaže da je ostvareno primanje po istom zahtjevu na više nivoa u BiH,
- d) Neopravdano neispunjavanje obaveza prema Savezu i FBiH,
- e) Smrću podnosioca zahtjeva.

(2) Sportista koji ostvaruje prava iz ovog Zakona dužan je u roku od 15 dana od dana nastanka bilo koje navedene okolnosti, prijaviti Ministarstvu svaku okolnost koja utiče na promjenu ili prestanak prava.

(3) Sportista koji je ostvario primanje na koje nije imao pravo dužan je vratiti primljene iznose odnosno nadoknaditi sve nastale troškove.

POGLAVLJE III – NADZOR, REVIZIJA I IZVJEŠTAVANJE

Član 14.

(Evidencija)

Ministarstvo je dužno voditi evidenciju o broju i realizaciji prava na teritoriji FBiH, sa finansijskom projekcijom.

Član 15.

(Kontrola realizacije)

(1) Ministarstvo i Komisija vrši nadzor nad realizacijom odobrenih sredstava i jednom godišnje izvještava Vladu FBiH o korištenju sredstava iz budžeta FBiH.

(2) Komisija iz člana 9. ovog zakona svake godine vrši nadzor da li i dalje zaslužni sportisti ispunjavaju uslove iz člana 6. ovog zakona, nakon čega daje preporuke ministru kulture za dalje postupanje.

(3) Ako se utvrdi da sportista ne ispunjava uslove u skladu sa članom 12. ovog zakona gubi pravo na mjesečnu novčanu naknadu.

Član 16.

Upravni i drugi nadzor nad zakonitošću rada u ovom postupku u pogledu primjene ovog zakona obavlja Ministarstvo.

Član 17.

Inspekcijski nadzor nad izvršenjem ovog Zakona obavlja Federalna inspekcija, inspektorat rada.

POGLAVLJE IV – PRELAZNE I ZAVRŠNE ODREDBE

Član 18.

(Formiranje Komsije)

(1) Vlada FBiH je dužna u roku od 60 dana od dana stupanja na snagu ovog Zakona formirati Komisiju iz člana 9. ovog Zakona i donijeti podzakonske propise.

Član 19.

(Stupanje na snagu)

Ovaj zakon stupa na snagu osam dana od dana objavljivanja u „Službenim novinama Federacije BiH“.

OBRAZLOŽENJE

ZA DONOŠENJE PRIJEDLOGA ZAKONA O DOŽIVOTNOJ NAKNADI ZASLUŽNIM SPORTISTIMA U FBIH

I. USTAVNI OSNOV

Ustavni osnov za donošenje ovog zakona sadržan je u odredbama člana III 2. e) u vezi sa članom III 3. (3) i člana III (4) Ustava Federacije Bosne i Hercegovine, kojim je utvrđeno da federalna vlast, uzimajući u obzir kantonalne nadležnosti, različite situacije u pojedinim kantonima i potrebu za fleksibilnošću, ima pravo utvrđivati politiku i donositi zakone koji se tiču svake od nadležnosti, kao i socijalne politike, a koji u skladu sa potrebama mogu biti ostvareni zajednički ili odvojeno, ili od strane kantona koordinirano od federalne vlasti.

II. RAZLOZI ZA DONOŠENJE ZAKONA

Trenutno u Federaciji Bosni i Hercegovini ima 38 vrhunskih sportista, koji su po kategorizaciji sportista u BiH, kategorizani kao zaslužni sportisti, t.j. osvajači najvećih priznanja na olimpijskim igrama, svjetskom prvenstvu, evropskom prvenstvu i paraolimpijskim igrama, a koji imaju navršanih 40 godina života i nisu ili ne mogu ostvariti pravo na penziju.

Naime, shodno članu 3. Pravilnika o kategorizaciji sportista u BiH (Službeni glasnik BiH, broj:52/16), sportisti koji su ostvarili značajne sportske rezultate razvrstavaju se u kategorije:a) ZASLUŽNI SPORTISTI(1) osvojeno I-III mjesto na Olimpijskim igrama;2) osvojeno I-III mjesto na Svjetskom prvenstvu;3) osvojeno I-III mjesto na Evropskom prvenstvu;4) osvojeno I-III mjesto na Paraolimpijskim igrama.b) VRHUNSKI SPORTISTA MEĐUNARODNOG RAZREDA:(1) ispunjena "A" norma ili ostvaren plasman za učešće na Olimpijskim igrama;2) ispunjena norma ili ostvaren plasman za učešće na Paraolimpijskim igrama;3) ispunjena norma ili ostvaren plasman za učešće na Specijalnoj olimpijadi;4) ostvaren plasman na Svjetsko prvenstvo.

Oni su najbolji predstavnici sporta u FBIH, a koji su često sami brinuli o takmičenjima, ulaganju u pripreme i ostvarivanju rezultata. Predstavili su federaciju i državu u najboljem izdanju, osvojili medalju na najvećim takmičenjima i neophodno je da za isto budu nagrađeni mjesečnom doživotnom naknadom.

Naknada je nagrada za njihov trud i rezultate, ali i stimulans mladim, perspektivnim nadama u sportu FBIH, da za svoj rad i trud mogu ostvariti izvanredne sportske rezultate i na kraju, doživotnu novčanu podršku federacije.

Praksa mjesečne naknade za vrhunske sportiste postoji u drugom entitetu u Republika Srpska, i to od 2011.godine, kao i u susjednim državama, Srbiji i Crnoj Gori. U Republici Srpskoj mjesečna naknada iznosi 1000 eura, u Srbiji 1400 eura.

U junu 2022.godine, Predstavnički dom Parlamenta FBiH jednoglasno je usvojen Nacrt Zakona o doživotnoj mjesečnoj naknadi zaslužnim sportistima u FBiH. 30.januara 2025.godine, Nacrt zakona je podržao i Dom naroda PFBiH.

Tokom razmatranja Nacrta u oba doma PFBiH, dostavljen je veliki broj komentara i sugestija, a dostavljen je i veliki broj komentara, sugestija i prijedloga i na opširnoj javnoj raspravi, održanoj u aprilu 2025.godine.

Prve komentare je dao Paraolimpijski komitet BiH, koji je tražio da se izjednače koeficijenti za obračun doživotne mjesečne naknade zaslužnim sportistima koji su osvajači medalja na Olimpijskim sa Paraolimpijskim igrama, što je prihvaćeno. Takođe, Komitet je sugerisao i prisustvo predstavnika Paraolimpijskog komiteta u Komisiji za dodjelu doživotne naknade, što je prihvaćeno, te su u Prijedlogu Zakona uvrštene navedene izmjene i dopune.

Jedan od predlagača Zakona u Predstavničkom domu PFBiH, Suad Kaknjo je sugerisao korekcije koeficijenata, shodno promjeni prosječne neto plate, kao i jasnijem i preciznijem definisanju finansijskih sredstava koje će biti namijenjene za ovu namjenu. Sugestije su u potpunosti prihvaćene, te je izvršena korekcija koeficijenata i jasna naznaka finansijskih sredstava za implementaciju Zakona, a što je obuhvaćeno tekstom Prijedloga Zakona.

Suad Kaknjo je predložio i razlikovanje između pojedinačnih i ekipnih disciplina, te gradiranje koeficijenata, shodno osvojenim medaljama na Olimpijskim i paraolimpijskim igrama, Svjetskom prvenstvu i Europskom prvenstvu. Sugestija je prihvaćena, jer se smatra da će doprinijeti većem ostvarivanju prava i načela pravednosti.

Sugestije je dostavio i Karate savez BiH, naglašavajući da je neophodno detaljnije definisati listu sportova koji ostvaruju pravo, tražeći da se navede lista sportova koju je priznao Međunarodni olimpijski komitet. Ova sugestija je djelomično prihvaćena, jer je u članu 6. Uslovi za ostvarivanja prava, preciznije navedeno da je jedan od uslova medalja u sportskim disciplinama u olimpijskim i paraolimpijskim sportovima, pod zastavom BiH ili u reprezentaciji BiH ili Jugoslaviji prije rata, shodno članu 7. ovog zakona. Isti komentar je dostavio i Željko Zombra – stručni savjetnik za pitanja madih i sport Grada Lukavca.

Zastupnice u Predstavničkom domu PFBiH, Ajla Milišić Pepić i Alma Beganović su dostavile komentare na Nacrt Zakona o nagrađivanju, uzdržavanju i kategorizaciji sportista u FBiH, a što se ne odnosi na odredbe Zakona o doživotnoj mjesečnoj naknadi zaslužnim sportistima u FBiH. Navedeni komentari nisu uzeti u razmatranje. Zastupnici Dario Knezović i Marijan Marjanović u Predstavničkom domu PFBiH su predložili detaljnije određivanje finansijskih sredstava kojih će biti usmjereni na zakonsku namjenu, te prijedlog da se napravi distinkcija između ekipnih i pojedinačnih sportova, što je prihvaćeno i uvršteno u Prijedlog Zakona.

Ministarstvo civilnih poslova BiH je dostavilo tri sugestije na tekst Nacrta Zakona, a koje se odnose na preciznije definisanje člana 2. i 4. , što je prihvaćeno i obuhvaćeno tekstom Prijedloga Zakona. Takođe, treća sugestija se odnosila na uvrštavanje osvajača Specijalne olimpijade, ističući da se radi na izmjeni Pravilnika o

kategorizaciji sportista u BiH, koji će obuhvatati i Specijalnu olimpijadu. Članom 6. definisano je da je jedan od uslova za ostvarivanje prava da je sportista kategoriziran kao zaslužni sportista u BiH, što znači da svako ko bude prepoznat shodno Pravilniku o kategorizaciji u BiH će ostvariti pravo.

Vrhunski sportista Hamza Alić i vrhunski trener Amel Kapo su govorili na javnoj raspravi o uvođenju u pravo trenera, ističući prakse pojedinih država, ali i određene izazove. Mišljenja smo da treneri trebaju biti adekvatno nagrađeni za uspjeh zaslužnog sportiste kroz potencijalne mehanizme jednokratne nagrade, financijske podrške profesionalnom radu i sl. ali da je veoma teško to učiniti putem predmetnog Zakona, jer je kompleksno odrediti ukoliko je više trenera koji su radili sa zaslužnim sportistom, koji će primiti naknadu, a koji ne, te na koji način će oni moći nastaviti svoje profesionalne obaveze.

Ministarstvo finansija je dostavilo tri sugestije, a koje se odnose na član 2., 6 i 10. Prijedloga Zakona. Sugestije su djelimično prihvaćene.

III. OBRAZLOŽENJE PREDLOŽENIH RJEŠENJA

Predloženi Prijedlog Zakona o doživotnoj naknadi zaslužnim sportistima u FBiH se sastoji od četiri poglavlja – Osnovne odredbe (član 1 – 4), Uslovi i način ostvarivanja prava (član 5-13), Nadzor, revizija i izvještavanje (član 14 – 17) i Prelazne i završne odredbe (član 18 - 19).

Članom 1. ovog zakona predstavlja se predmet, ističući da se uređuju uslovi i način za ostvarivanje prava doživotne novčane mjesečne naknade zaslužnim sportistima u FBiH, obaveze zaslužnih sportista, evidencija, nadzor i revizija nad ostvarenim pravima u FBiH.

U članu 2. predstavljene su definicije najznačajnijih izraza, među kojima je doživotna naknada, sportisti koji stiču pravo na dodjelu navedene naknade, zaslužni sportista iz Jugoslavije, Komisija koja vrši provođenje postupka.

Članom 3. definisan je cilj ovog zakona zaslužnim sportistima da ostvare pravo na doživotnu mjesečnu novčanu naknadu, posmatrajući navedeno pravo kao nagradu za zalaganje i postignute rezultate, ali i stimulans mladim i perspektivnim sportistima u FBiH.

Članom 4. otklonjena je svaka sumnja u diskriminaciju, dok je Član 5. definisao financijska sredstva iz kojih će biti isplaćena naknada zaslužnim sportistima,

Članom 6. su navedeni uslovi za ostvarivanje prava – starosna dob od 40 godina, da je sportista osvojio medalju pod zastavom BiH ili u reprezentaciji BiH ili Jugoslaviji prije rata, a u olimpijskim i paraolimpijskim sportovima, da je kategoriziran kao zaslužni sportista, da ima državljanstvo BiH i da živi u FBiH, te da nije mijenjao državljanstvo nakon osvajanja medalje ili nastupao za drugu državu, da ima potvrdu nadležnog sportskog saveza, da ne prima naknadu bilo kojeg drugog nivoa u BiH, da nije pravosnažno osuđen, te da nema mjere zabrane takmičenja zbog anti doping pravila, dok je u članom 7. naveden detaljan način ostvarivanja prava, koji podrazumijeva da će Ministarstvo raspisati svake godine javni poziv na koji će zaslužni sportisti biti dužni dostaviti relevantnu dokumentaciju, kao potvrdu za ostvarivanja prava po članu 6. Zakona.

U članu 8. definisano je provođenje postupka, navodeći da će pri okončanju radnih zadataka stručne Komisije za dodjelu doživotne mjesečne naknade, biti sačinjen Prijedlog Odluke o dodjeli mjesečnih naknada zaslužnim sportistima i isti dostavljen federalnom ministru kulture i sporta. Nakon što Ministar isto potvrdi, Ministar objavljuje Rješenje o dodjeli sredstava, najkasnije do 30.aprila svake godine.

Članom 9. definisan je sastav, mandat i zadaci Komisije za dodjelu doživotne mjesečne naknade.

U članu 10. su navedeni koeficijenti za obračun doživotne mjesečne naknade, shodno ostvarenom rezultatu na olimpijskim igrama, svjetskom i evropskom prvenstvu i paraolimpijskom igrama. Iznosi se referišu na prosječnu neto platu u FBiH, a selektovani su u dvije kategorije: Pojedinačne discipline (zaslužni sportisti) i Ekipne discipline (za članove ekipe).

Članom 11. ovog zakona definišu se obaveze sportista koji ostvare pravo, kao što je odazivati se na pozive nadležnog sportskog saveza, sarađivati sa Ministarstvom i Olimpijskim komitetom i Federalnim ministarstvom kulture i sporta, prenositi svoje znanje u školama i slično, a članom 12. detaljnije definiše naknadu, isključujući mogućnost naslijeđivanja ili ostvarivanja prava po više osnova.

Članom 13. definisane su okolnosti po kojima prestaje pravo ostvareno po Zakonu, a koje obuhvata prestanak uslova neophodnih za ostvarivanja prava, davanje lažnih podataka, neopravdano neispunjenje obaveza prema Savezu i FBiH ili smrću zaslužnog sportiste.

Član 14. ovog zakona definiše evidenciju prava u Ministarstvu, članovi 15., 16., 17., kontrolu i nadzor, dok članovi 18. i 19. definišu prelazne i završne odredbe u smislu formiranja nadležne Komisije, usvajanja podzakonskih akata i stupanja na snagu Zakona.

IV. FINANCIJSKA SREDSTVA

Za provođenje ovog zakona potrebna su finansijska sredstva u iznosu od 1.250.000 KM godišnje u budžetu FBiH.

OBRAZAC ZA PROVOĐENJE SKRAĆENE PROCJENE UTICAJA PROPISA

Naziv aktivnosti	Prijedlog Zakona
Naziv zakona	Prijedlog Zakona o doživotnoj mjesečnoj naknadi zaslužnim sportistima u FBiH
Datum	Septembar 2025
Obrađivač	Zastupnici/delegati u Predstavničkom domu i Domu naroda PFBiH

I. Usklađenost zakona sa strateškim dokumentima/Programom Vlade Federacije Bosne i Hercegovine i Parlamenta Federacije Bosne i Hercegovine

Je li Zakon u skladu sa strateškim dokumentima i programom rada Vlade Federacije i Parlamenta Federacije Bosne i Hercegovine?

Odgovor: DA, Predloženi Prijedlog zakona je u skladu sa Trogodišnjim planom rada Federalnog Ministarstva kulture i sporta za 2024-2026.godinu.

Je li povezan sa drugim važećim propisima ili ima učinak na druge važeće propise? Ako da, navedite koje?

Odgovor: Prijedlog Zakona o doživotnim mjesečnim naknadama je povezan sa Pravilnikom o kategorizaciji sportista u Bosni i Hercegovini („Službeni glasnik BiH“, broj: 52/16), Prijedlogom budžeta FBiH za 2026.godinu i Prijedlogom Zakona za izvršenje budžeta FBiH za 2026. godinu.

Takođe, važno je naglasiti da je ovaj Prijedlog zakona povezan sa važećom Uredbom o određivanju kriterija za dodjeljivanje nagrada sportistima, sportskim radnicima i sportskim udruženjima iz FBiH za ostvarene vrhunske sportske rezultate na međunarodnim takmičenjima („Službene novine FBiH“, broj: 27/12, 74/13, 4/15, 10/22) i Odlukom o programu utroška sredstava s kriterijima raspodjele sredstava Tekućeg transfera za sport od značaja za Federaciju Federalnog ministarstva kulture i sporta utvrđenog budžetom FBiH u iznosu od 880.000 KM.

Prilikom izrade Zakona, predlagači su imali u vidu Uredbu o Uredu Vlade Federacije Bosne i Hercegovine za zakonodavstvo i usklađenost s propisima Europske unije („Službene novine Federacije BiH“, broj: 26/20 i 76/20) i Uredbu o postupku usklađivanja zakonodavstva Federacije Bosne i Hercegovine s pravnom stečevinom Europske unije („Službene novine Federacije BiH“, broj: 98/16) i u tom smislu smo izvršili analizu europske pravne stečevine, te ustanovili da ne postoje primarni ili sekundarni izvori europskog prava koji reguliraju predmetnu materiju.

II. Ocjena trenutnog stanja i ciljevi koji se žele postići prijedlogom Zakona?

Koji je osnovni problem? Zašto postojeće stanje nije zadovoljavajuće?

Odgovor: Federacija Bosna i Hercegovina je jedina regija koja trenutno nema uređeno pitanje doživotnih mjesečnih naknada u regionu, do sada su to učinile sve susjedne države i drugi bh entitet Republika Srpska.

To dovodi do neravnopravnog položaja zaslužnih sportista u FBiH, diskriminacije, ali i sve težeg podsticaja za mlade da se bave i teže vrhunskom sportu u FBiH. Naime, uprkos raznim pokušajima da se ovo pitanje uredi na državnom nivou, jedinstvena i jednaka regulacija nije ostvarena u cijeloj BiH. Godinama se stoji u mjestu, dok naši vrhunski sportisti, predstavnici na najvećim sportskim

takmičenjima i osvajači najvećih medalja bivaju prepušteni sami sebi.

Tokom javne rasprave više učesnika je istaklo da su vrhunski sportisti u FBiH nakon završetka karijere prepušteni sami sebi, bez sistematske finansijske podrške, iako su svojim rezultatima značajno promovisali državu. Time se stvara osjećaj nepravde i zapostavljenosti, a mladim sportistima se šalje poruka da sport u BiH ne garantuje egzistenciju nakon karijere.

Postojeće stanje sporta u BiH nije zadovoljavajuće iz više razloga:

- Nedostatak jedinstvene strategije i zakonskog okvira na državnom nivou
- Nedovoljna finansijska ulaganja
- Nedostatak motivacije za mlade sportiste
- Nedovoljna briga za vrhunske sport
- Slaba institucionalna koordinacija

Drugim riječima, problema je mnogo i nalaze se u cijelom sistemu, a ovaj zakon nastoji mijenjati jedan segment - odnos prema vrhunskim sportistima nakon profesionalne karijere, putem mjesečne naknade, ali i održavanja veze sa sportskim događajima i novim mladim naraštajima.

Koji se cilj želi postići? U kojoj mjeri se očekuje da će prijedlog Zakona riješiti definisani problem i u kojem razdoblju?

Odgovor: Cilj je promijeniti dosadašnji status quo i pokazati mladima ljudima da vrijedi, te da će njihov trud i rad biti nagrađen i prepoznat kroz sistem i kasnije kroz doživotne mjesečne naknade. Prijedlog Zakona nastoji promijeniti činjenicu da je FBiH jedina regija koja nema ovo pitanje regulisano u regionu, te dati nagradu našim zaslužnim sportistima, ali i biti stimulans i ohrabriljenje mladim i novim sportskim snagama.

Navedite sve subjekte (ministarstva, uprave, upravne organizacije, organizacije civilnog društva itd) koji će direktno primjenjivati i na koje se direktno odnosi prijedlog Zakona.

Odgovor: Federalno ministarstvo kulture i sporta, Olimpijski komitet, Paraolimpijski komitet, sportski savezi, osvajači medalja na Olimpijskim, Paraolimpijskim igrama, sportskim prvenstvima, europskim prvenstvima.

III. Proces konzultacija

Navedite sve subjekte s kojima ste se konzultirali i na način na koji ste vršili konzultacije (javna rasprava, pisani komentari, itd.)

Odgovor:

Nacrt Zakona o doživotnoj mjesečnoj naknadi je usvojen tokom 2022. godine u Predstavničkom domu PFBiH, a krajem januara 2025. godine i u Domu naroda PFBiH.

Predstavnici Parlamenta FBiH, kao i svi zainteresirani pojedinci, građani, udruženja su dostavljala mišljenja, prijedloge i sugestije, koja su uzeta u razmatranje. Takođe, 30.04.2025. godine, je održana šira javna rasprava u zgradi PFBiH, na kojoj je bio prisutan veliki broj predstavnika institucija, sportskih saveza, udruženja, sportista, zastupnika/delegata, zainteresiranih pojedinaca, predstavnici Olimpijskog komiteta, Paraolimpijskog komiteta i drugi.

Svi prisutni su dostavili svoje komentare, mišljenja i prijedloge, a pored toga određeni dio je pristigao i putem email pošte predlagača u Predstavničkom i Domu naroda PFBiH.

Koji su rezultati konsultacija i na koji način su uticali na sadržaj zakona?

Odgovor: Javna rasprava je rezultirala velikim brojem konkretnih prijedloga, primjedbi i sugestija, od kojih je velik broj prihvaćen i uvršten u tekst Prijedloga Zakona.

- Paraolimpijski komitet je tražio izjednačavanje koeficijenata olimpijskih i paraolimpijskih igara, što je prihvaćeno, te obuhvaćeno Prijedlogom Zakona.
- Paraolimpijski komitet je predlagao uključivanje predstavnika Paraolimpijskog komiteta u Komisiji za dodjelu doživotne mjesečne naknade, što je prihvaćeno i obuhvaćeno Prijedlogom Zakona.
- Suad Kaknjo je ukazao na neophodno usklađivanje iznosa naknada, zbog promjene iznosa prosječne neto plate, što je prihvaćeno i korigovano u Prijedlogu Zakona.
- Olimpijski komitet BiH je predložio preciznije određivanje odredbi o prestanku prava na naknadu, što je djelomično prihvaćeno, kao i jasnije određivanje rješavanja pitanja finansiranja, što je takođe, prihvaćeno i jasno navedeno da će se sredstva osigurati budžetom Federacije BiH.
- Ministarstvo finansija je dostavilo sugestije u pogledu jasnijeg definisanja određenih pojmova, ali i utvrđivanja uslova za sticanje prava. Prijedlozi su djelomično prihvaćeni i uvršteni u tekst Prijedloga Zakona.
- Stigao je i veliki broj prijedloga da se u Prijedlogu zakona, u pravo uvedu i treneri zaslužnih sportista, međutim navedeni prijedlog nije prihvaćen. Uvjerena smo da se i treneri trebaju nagraditi za uspjeh sportista, ali smo mišljenja da se to mora učiniti putem drugih mehanizama u okviru Zakona o sportu, dodjeli jednokratnih nagrada i sl. Mišljenja smo da ovaj Prijedlog Zakona nema mehanizme putem kojih može definisati koji treneri, u kojem omjeru i na koji način mogu ostvariti mjesečnu naknadu, pogotovo kada su u profesionalnom radnom odnosu.
- Stigao je i veliki broj prijedloga da osvajači takmičenja u neolimpijskim sportovima ostvare pravo na mjesečnu doživotnu naknadu, međutim navedeni prijedlog je odbijen. Smatramo da je veoma teško napraviti takvu klasifikaciju sportova, te definisati koji sportovi će biti uvršteni, a koji ne. Naš kriterij je priznanje od Međunarodnog olimpijskog komiteta i Paraolimpijskog komiteta – sportske discipline koje bude uvrštene na olimpijske i paraolimpijske igre, te sportisti koji na tim takmičenjima ostvare rezultate, bit će uvršteni.

IV. Alternativna rješenja – identifikacija opcija

Navedite opcije koje ste razmatrali, s kojima se može riješiti definirani problem i ostvariti cilj. Kratko opišite rezultate svake od tih opcija.

Odgovor: Razmatrali smo prijedlog da se ovo pitanje uredi Zakonom na državnom nivou ili Uredbom na federalnom nivou, međutim odustali smo od navedenih opcija iz nekoliko razloga.

Prije svega na državnom nivou trenutno ne postoji dovoljno političke volje i mogućnosti za postizanje dogovora o ovako važnom pitanju, što je posljedica dugotrajne političke krize i blokada u donošenju zakona koji zahtijevaju široki konsenzus. Iskustvo iz prethodnih godina pokazuje da bi pokušaj donošenja zakona na nivou BiH mogao trajati godinama, bez ikakvih garancija da će biti razmatran.

S druge strane, donošenje Uredbe na federalnom nivou nije dovoljno snažno i dugoročno rješenje, jer uredba ima nižu pravnu snagu od zakona, vremenski je ograničena i podložna brzim izmjenama ili ukidanju. Uredbom bi se osiguralo privremeno rješenje, ali ne i stabilan i trajan sistem podrške zaslužnim sportistima.

Zbog toga smo se odlučili fokusirati na izradu i donošenje zakona na nivou FBiH. Ovim pristupom

imamo realnu mogućnost da pitanje bude riješeno u zakonodavnom okviru koji će pružiti jasne kriterije, stabilno finansiranje i dugoročnu pravnu sigurnost korisnicima. Na ovaj način želimo izbjeći dalja odgađanja i osigurati da zaslužni sportisti što prije ostvare pravo na doživotnu mjesečnu naknadu, o uzoru na rješenja koja već postoje u drugim dijelovima BIH i regiona.

Objasnite zašto je ova opcija najpovoljnija za rješenje problema.

Odgovor: Predstavnički dom i Dom naroda Parlamenta Federacije Bosne i Hercegovine su usvojili Nacrt ovog zakona, čime je zakonodavni proces prošao više od pola puta. Time je potvrđeno da postoji politička volja i široka podrška da se ovo pitanje konačno riješi.

V. Uticaj odabranih rješenja problema na gospodarstvo, društvo i okoliš

1.a) Utiče li zakon na poslovno okruženje? kreira li dodatna administrativna opterećenja? Utiče li na rad malih i srednjih preduzeća i obrtnika? Hoće li imati uticaja na funkcionisanje tržišta i konkurenciju?

Odgovor: Ne. Predloženi zakon neće imati negativan uticaj na poslovno okruženje, niti će kreirati dodatna administrativna opterećenja za privredne subjekte. Njegova primjena neće zahtijevati nove procedure, obaveze ili troškove za mala i srednja preduzeća, obrtnike ili bilo koji segment privrede, budući da se zakon odnosi isključivo na reguliranje prava zaslužnih sportista i na način finansiranja iz javnih sredstava planiranih u budžetu FBiH.

Takođe, zakon neće imati uticaja na funkcionisanje tržišta niti na narušavanje konkurencije, jer ne mijenja pravila tržišnog poslovanja niti daje privilegije određenim privrednim subjektima. Naprotiv, može se očekivati posredan pozitivan efekat – kroz razvoja sporta, povećanje društvene prepoznatljivosti sportskih dostignuća i motivaciju mladih da se bave sportom, što dugoročno doprinosi zdravlju populacije, promociji zemlje i eventualno jačanju sportske industrije.

U konačnici, iako zakon nema direktne veze sa privrednim sektorom, on može indirektno doprinijeti razvoju srodnih djelatnosti (sportski marketing, sportska oprema, organizacija sportskih događaja), čime može pozitivno uticati i na poslovno okruženje u FBiH.

1.b) Koji su finansijski rizici zakona? Utiče li na operativne troškove i obavljanje poslovanja?

Odgovor: Nisu neophodna ogromna finansijska sredstva, već neznatna i neće mnogo opteretiti Budžet FBiH.

Takođe, s obzirom da već postoji transfer za sport od značaja za Federaciju BIH, u punom iznosu od 880.000 KM, a među kojima se nalaze i osvajači vrhunskih sportskih rezultata na međunarodnim takmičenjima, a koji ostvaruju pravo da ostvare mjesečnu doživotnu naknadu, dio sredstava za sport će se preusmjeriti za ove namjere.

2.a) Utiče li zakon na mogućnost zapošljavanja i tržište rada?

Odgovor: Zakon će utjecati na mogućnost zapošljavanja i tržište rada na način da zaslužni sportisti koji ostvare pravo na doživotnu mjesečnu naknadu neće moći istovremeno biti evidentirani kao nezaposlene osobe u evidenciji Zavoda za zapošljavanje, niti će imati pravo na primanje novčane naknade po osnovu nezaposlenosti ili bilo kojeg sličnog prava na drugom administrativnom nivou u BIH.

2.b) Tretira li pitanje ravnopravnosti spolova? Je li osigurana socijalna uključenost i zaštita posebnih skupina pri mogućnosti pristupa zdravstvenog i socijalnoj skrbi i obrazovanju?

Odgovor: Da. Zakon izričito onemogućava diskriminaciju na osnovu spola, čime se osigurava ravnopravnost muškarca i žena u ostvarivanju prava. Posebna pažnja posvećena je jednakom tretmanu sportista i sportiskinja, kao i priznavanju dostignućih svih, bez obzira na spol ili vrstu sportskog natjecanja. Osvajači medalja s Olimpijskih i Paraolimpijskih igara imaju potpuno ista prava i pogodnosti. Na taj način zakon doprinosi socijalnoj uključenosti i štiti posebne skupine, potičući pristup zdravstvenoj i socijalnoj skrbi te obrazovanju pod jednakim uvjetima za sve.

3.) Hoće li zakon imati negativan uticaj na okoliš?

a.) DA

b.) NE

Objasnite: Apsolutno nema negativnog uticaja na okoliš, budući da se zakon isključivo odnosi na područje socijalne politike i reguliranja prava određene skupine građana. Njegove odredbe ne uključujući nikakve aktivnosti ili mjere koje bi mogle dovesti do fizičkih promjena u prostoru, povećanja emisija štetnih tvari, korištenja prirodnih resursa ili ugrožavanja bioraznolikosti. Stoga se može zaključiti da je zakon potpuno neutralan u odnosu na okoliš, a njegov učinak je isključivo društveno – socijalnog karaktera.

VI. PROVOĐENJE ZAKONA

1.) Precizira li zakon ko je odgovoran za njegovu primjenu i na koji način? Koja razina vlasti je mjerodavna za njegovu primjenu? Ko vrši nadzor?

Odgovor: Zakon jasno precizira da je za primjenu, nadzor i reviziju zaslužno Federalno ministarstvo kulture i sporta, koji će objavljivati javne pozive, dok će Komisija za dodjelu shodno pristiglim zahtjevima, donositi prijedlog Odluke. Konačno rješenje će donijeti federalni ministar kulture i sporta.

2.) Je li zakon usaglašen sa drugim važećim propisima?

Odgovor: Zakon je usaglašen sa drugim propisima, i nije u koliziji ni sa jednim trenutno zakonom u FBiH ili BiH.

3.) Je li prelazno rješenje novog zakona jasno precizirano?

Odgovor: Da. Zakonom je navedeno da je neophodno 60 dana da se donesu podzakonski akti i formira Komisija za dodjelu doživotnih mjesečnih naknada.

[illegible]

CATEGORIA	NOME	PLACARD ELETTORALE	TIRANDO STAMPARE		POTERINO	
			Esclusivo + Minor 0	0-1	0-2	
1	SALE MAZZOARO					

PERIOD	SISTEMATIZOVANO			PLANIRANO BUDŽETOM			TRENUTNO STANJE		POTREBNO		
	Postojeće stanje (n)	n+1	n+2	Postojeće stanje (n)	n+1	n+2	Postojeće stanje (n)	n+1	n+2		
Poljoprivredni službenici i Savjetnici Službenici i Namještenici Volonteri UKUPNO											
Općarizovanje	Za potrebe implementacije Zakona, neophodno je planirati u budžetu FBiH finansijska sredstva u iznosu od 1.250.000 KM, na razdjelu i kodu Federalnog ministarstva kulture i sporta. Procjena neophodnih sredstava je uobičajna na osnovu ukupnog broja sportista koji su trenirano stekli usluge za ostvarivanje prava koeficijentata koji su navedeni u članu 10. Prijedloga Zakona, te iznosa prosječne plate u FBiH. Procijenili smo da je trenutno 38 sportista koji su stekli usluge za naknadu, te da se taj broj neće značajno mijenjati u naredne tri godine. Procjena je da će se isplaćati tek za pet i više godina, kada će iznositi 60, jer će usluge stići pos 12. vrtulinskih sportista										
5. Potencijalne obaveze za budžet											
NAZIV											
Garancije											
Ostalo											
E.6. Fiskalni efekt na druge nivoe vlasti											
NAZIV											
Budžet BiH, vanbudžetski fondovi i korisnici											
Budžet Federacije Bosne i Hercegovine, Federalni vanbudžetski fondovi i korisnici	Za potrebe implementacije Zakona, neophodno je planirati u budžetu FBiH finansijska sredstva u iznosu od 1.250.000 KM, na razdjelu i kodu Federalnog ministarstva kulture i sporta. Namire, već postoji transfer za sport od značaja osvajanja medalja, a koji su stekli usluge za ostvarivanje pojedinačne naknade bi preraspoređeni u ovu namjenu.										
Budžet kantona, vanbudžetski fondovi i korisnici											
Budžet Brčko distrikta Bosne i Hercegovine											
Jednice lokalne samouprave (općine i gradovi)											
F.7. Pečat i popis odgovornog lica obradivaca, odnosno nadležnih osoba											
Adisa Kokić - Hrnović											
Mjesto i datum											
Sarajevo, 10.09.2025.godine											

Broj: 06-02-4-7806/25
Sarajevo, 25.9.2025.godine

PARLAMENT FEDERACIJE BOSNE I HERCEGOVINE
PREDSTAVNIČKI DOM
ADISA KOKIĆ – HINOVIĆ

Bosna i Hercegovina
Federacija Bosne i Hercegovine
PARLAMENT FEDERACIJE
SARAJEVO

25-09-2025

Org. jed.	Broj	Priloga	Vrijednost
01	-02-	191	122

PREDMET: Mišljenje - daje se

V E Z A: Vaš akt broj: Zahtjev za dostavu mišljenja o fiskalnoj procjeni propisa, od 10.9.2025. godine

Federalno ministarstvo finansija - Federalno ministarstvo financija razmotrilo je dostavljeni Prijedlog Zakona o doživotnoj naknadi zaslužnim sportistima u FBiH, (u daljem tekstu: Prijedlog zakona), broj i datum veze dostavljen od strane predlagača Adisa Kokić - Hinović zastupnik u Predstavničkom domu Parlamenta Federacije Bosne i Hercegovine (u daljem tekstu: Predlagač), te na osnovu člana 27., stav 1. Poslovnika o radu Vlade Federacije Bosne i Hercegovine – Prečišćeni tekst ("Službene novine Federacije BiH" br. 6/10, 37/10, 62/10, 39/20 i 67/21) (u daljem tekstu: Poslovnik), daje sljedeće:

MIŠLJENJE

- I. Predlagač je dostavio Prijedlog zakona Federalnom ministarstvu finansija - Federalnom ministarstvu financija na mišljenje u skladu sa članom 27., stav 1. Poslovnika.
- II. Donošenjem ovog Zakona uređuju se uslovi i način za ostvarivanje prava doživotne naknade zaslužnim sportistima u Federaciji Bosne i Hercegovine, obaveze zaslužnih sportista, evidencija, nadzor i revizija ostvarenih prava.
- III. Predlagač, na osnovu Pravilnika o proceduri za izradu izjave o fiskalnoj procjeni zakona, drugih propisa i akata planiranja na budžet („Službene novine Federacije BiH, broj 34/16 i 15/18), uz Prijedlog zakona je dostavio uz Prijedlog zakona prilaže Obrazac izjave o fiskalnoj procjeni, IFP-DA, kojim ističe da za provođenje ovog Zakona potrebna su sredstva u ukupnom iznosu od od 1.250.000,00 KM godišnje u Budžetu Federacije Bosne i Hercegovine.

Na osnovu prethodno navedenog, Federalno ministarstvo finansija - Federalno ministarstvo financija, u okviru svoje nadležnosti, a na osnovu dostavljenog teksta Prijedloga zakona, ponovo ukazuje na sljedeće:

- Član 2. tačka c), sugerišemo Predlagaču da se tekst „Sportista koji ostvaruje pravo doživotne mjesečne nagrade na osnovu rezultata koje je ostvario kao reprezentativac Jugoslavije...” zamjeni tekстом: „Sportista koji ostvaruje pravo doživotne mjesečne nagrade na osnovu rezultata koje je ostvario kao reprezentativci bivše Jugoslavije i osvojili I-III mjesto na takmičenjima iz tačke b)...”

- Sugerišemo Predlagaču da se u članu 6. (Uslovi za ostvarivanje prava), propišu dodatni uslovi za ostvarivanje prava na doživotnu mjesečnu naknadu (npr. da nije korisnik prava iz osnova penzijskog i invalidskog osiguranja, da nije u radnom odnosu i danema registrovanu samostalnu djelatnost, ograničenje u vidu mjesečnog prihoda članova domaćinstva, da ne ostvaruje druge oporezive prihode iznad određenog iznosa i sl.), te shodno tome usklade odredbe člana 7. i člana 13.
- Također, u članu 6. da se u tački e) iza riječi državljanstvo veznik „ili“ zamjeni zarezom a iza riječi države doda novi tekst: „ili nastupao u klubovima druge države“,
- U članu 10. stav 2. (Koeficijenti za izračun doživotne mjesečne naknade), riječi: „prosječne plate u FBiH“ zamjene riječima „prosječne neto plate u FBiH“.

Na osnovu prethodno navedenog Federalno ministarstvo finansija - Federalno ministarstvo financija, u okviru svoje nadležnosti, ističe da za provođenje Prijedloga Zakona o doživotnoj naknadi zaslužnim sportistima u FBiH, nisu planirana finansijska sredstva u Budžetu Federacije Bosne i Hercegovine, te da bi za njegovu implementaciju bilo potrebno osigurati finansijska sredstva u minimalnom iznosu od 1.250.000,00 KM na godišnjem nivou. Imajući u vidu ograničene kapacitete i realne mogućnosti Budžeta Federacije Bosne i Hercegovine, Federalno ministarstvo finansija iskazuje rezervu po pitanju osiguranja finansijskih sredstava za navedene namjene.

Ovo mišljenje je dato na osnovu odredbi Prijedloga zakona koji se obrađuje i podataka navedenih u Obrascu IFP-DA izjave o fiskalnoj procjeni, čija tačnost je u isključivoj odgovornosti Predlagača, te ukoliko se naknadno utvrdi da navedene odredbe i podaci odstupaju od stvarno činjeničnog stanja, ovo mišljenje će se staviti van snage.

S poštovanjem,


MINISTAR
Toni Kraljević

Dostaviti:

- a) Naslovu
- b) a/a